

Re rox carta re xutz'ibaj can re apóstol San Juan

Re nabey tak tzij chin re carta re'

¹Yen Juan, re ec'uay quichin re hermanos, nintz'ibaj-a re carta re' chava rat hermano Gayo. * Roma ataman che katzij che yen can yatinjo-va.

²Hermano camas yatinjo', re nu-oración yen cha re Dios ja-ta che rat otz-ta yatbinak riq'uin ronojel, y manak-ta yabil chupan re ac'aslen. C'o-ta jun ac'aslen otz. Can-ta ancha'l yatbinak riq'uin re ac'aslen ac'uan chach re Dios. ³Y jare' re nibano chua che camas yinqui'cot pa vánma, * roma jec'o hermanos re xe'tzijon can chua che can katzij animan re ruch'abal re Dios, y can otz re c'aslen ac'uan. ⁴Y ronojel bey tak ninc'axaj che re hermanos re can je ancha'l vaje'ual, * can katzij quiniman re ruch'abal re Dios, camas yinqui'cot pa vánma. Roma can man jun chic re nibano-ta cha re vánma che más-ta niqui'cot.

Re hermano Gayo ye'ruto' re ruvinak

⁵Hermano Gayo, riq'uin re utzil re yatajin chubanic, can nac'ut che can abanon confiar-avi' riq'uin re Dios. Rat can atz'amon quito'ic re hermanos re jec'o pan atenemit, y quire' chuka' naban quiq'uin re hermanos * re ye'pa naj. ⁶Y reje' can xquitzijoj chique re hermanos tak quimalon-qui'. Xquitzijoj che re avánma camas nijovan. Mare' yen ninc'utuj utzil chava che ronojel bey tak ye'k'ax aviq'uin, taya-a re nic'atzin chique. Roma can niquiban re rusamaj re Dios. ⁷Reje' ye'biyaj chin niqutzijoj re ruch'abal re Jesucristo chique re vinak re c'amaje-na tiquinimaj, y reje' man chique-ta re vinak re' niquic'utuj-va * che que'quito' riq'uin vay o riq'uin mero. ⁸Mare' nic'atzin che ja yoj re yojta'o quichin riq'uin mero o riq'uin vay, riq'uin re' yoj chuka' nakaban re rusamaj re Dios, roma ye'kato-a tak je'binak chutzijosic re katzij ch'abal.

* Hch. 19:29; 20:4; Ro. 16:23; 1 Co. 1:14. * 2 Jn. 4. * 1 Co. 4:15; Flm. 10. * Ga. 6:10.
* 1 Co. 9:14, 15.

Re ye'ruban re Diótrufes man otz-ta

⁹Yen xintak-yan-a jun carta chique re hermanos re niqumol-qui' pa rube' re Dios chire' pan atenemit. Pero re Diótrufes man xunimaj-ta re ximbij, roma reja' can nuna' che camas ruk'ij y nika chach che rion reja' nic'uau quichin re hermanos. ¹⁰Mare' vo xa xquinapon iviq'uin, xtimbij chiquivach re hermanos re nuban reja', q'uiy cosas ye'rubila' chakij y xa man je katzij-ta. * Y man xe-ta re' re ye'ruban. Chuka' man ye'ruc'ul-ta re hermanos re ye'k'ax riq'uin. Y man nuya-ta chuka' k'ij chique re nic'aj chic hermanos che ye'quic'ul-ta re ye'bapon quiq'uin. Y vo xa man niqunimaj-ta rutzij, ye'rulisaj-a chiquicojol re hermanos.

Re ruc'aslen re hermano Demetrio camas otz

¹¹Hermano re camas yatinjo', nimbij chava: Man tatzekelbej re man otz-ta. Xa ja re otz* jare' re tatzekelbej. Roma re nibano re otz, can c'o chic-apan riq'uin re Dios. * Jac'a re nibano re man otz-ta, man rutaman-ta rach re Dios.

¹²Conojel ye'bin che re ruc'aslen re hermano Demetrio, camas otz. * Y ja chuka' nakabij yoj. Y yex itaman che yoj man nakatz'uc-ta tzij. * Reja' can katzij rutzekelben re ruch'abal re Dios.

Ja ruq'uisibal tak ch'abal cha re carta re'

¹³C'o q'uiy cosas ninjo' nimbij chava. Pero man ninjo-ta nintz'ibaj más chupan re carta re'. * ¹⁴Roma yen ninjo' yinapon-yan aviq'uin* y c'ajare' tak xkojch'o chij re'.

¹⁵Y re avánma can-ta otz nuna' roma animan chic re Jesucristo. Re hermanos jec'o vova' niqutak-a ruxnokil-avach. Y rat tabana' utzil taya' ruxnokil-quivach che ja'jun che ja'jun re hermanos re jec'o chire'.

* 1 Ti. 5:13. * Sal. 37:27; Is. 1:16, 17. 1 Co. 4:16; 11:1; 1 Jn. 2:24. * 1 Jn. 3:6.

* 1 Ti. 3:7. * Jn. 21:24. * 2 Jn. 12. * 2 Jn. 12.